

Krađa auta nije spriječila Francuza da nastavi putovanje po BiH

Mark Rože u Sarajevu čitao poeziju i prozu bh. autora

Danas Mark Rože putuje u Višegrad, gdje će na mostu Mehmed-paše Sokolovića čitati odlomke iz djela "Na Drini ćuprija" bh. nobelovca Ive Andrića

SARAJEVO - Francuz Mark Rože, koji već tri godine putuje po svijetu čitajući poeziju i prozu, nastavio je juče u Sarajevu putovanje po BiH, saopšteno je iz Francuskog kulturnog centra "Andre Molro" u Sarajevu.

"Iako auto sa knjigama Marka Rožea, koji je 7. decembra ukraden u Mostaru, još nije pronađen, mi smo prikupili potrebnu literaturu, tako da je Rože već danas čitao ulomke proznih tekstova i poeziju bh. književnika i pjesnika, kao i svih poznatih autora iz Evrope i svijeta", kazala je juče Elma Džanić, portparol Centra "Andre Molro".

Rože se juče družio sa gimnazijalcima Katoličkog školskog centra u Sarajevu, a sinoć je čitao poeziju i prozu u prostorijama Francuskog kulturnog centra u Sarajevu. Rože je čitao ulomke iz opusa poznatog italijanskog pisca Errija de Lucea.

"Već danas Mark Rože putuje u Višegrad, gdje će na mostu Mehmed-paše Sokolovića čitati ulomke iz djela 'Na Drini ćuprija' bh. nobelovca Ive Andrića", dodala je Džanićeva.

Ona je istakla da je Rože trebao posjetiti i srednje škole na području Kantona Sarajevo, ali da je zbog štrajka profesora njegova posjeta odgođena dok štrajk ne bude obustavljen.

"Pored srednjih škola i visokoškolskih ustanova Mark Rože posjetit će u petak i knjižaru 'Buybook' gdje će sa bh. piscem Farukom Šehićem čitati poeziju. Predviđeno je da početkom naredne sedmice Rože čita i u zatvoru poluotvorenog tipa u Blažuju", objasnila je Elma Džanić.



Rože čita u Katoličkom školskom centru

NN FOTO

M. LINGO